

M023: Frau Ava: Jüngstes Gericht (V)

0,1 Nu sol ich rede rechen .
0,2 uil uorhtlichen .
0,3 uon dem iungisten tage .
0,4 als ich uernomen habe .
0,5 unde uon der ewigen corone .
0,6 die got gibet ze lone .
0,7 swelehe wole gestriten .
0,8 an dem iungisten zite .
0,9 Fünfzehen zeichen gescehent .
0,10 so die wisten iehent .
0,11 wir ne uernamen nie niht mere .
0,12 uon so bitterme sere .
0,13 so bibent allez da der ist .
0,14 so nahet uns der heilige crist .
0,15 An dem ersten tage . also ich uernomen habe .
0,16 So heuet sich diu chlage .
0,17 so wirt daz zeichen da ze stunt .
0,18 diu wazer smiegent sich an den grunt .
0,19 uierzech clafter iz in get .
0,20 einen tach iz also gestet .
0,21 An dem anderen tage .
0,22 daz sul wir iu sagen .
0,23 so get iz auer wider uz .
0,24 uil hohe leinet iz sich wider huof .
0,25 so biginnet iz pellen .
0,26 mit michelen wellen .
0,27 daz iz alle die horent .
0,28 die den sin dare cherent .
0,29 uber elliu diu riche .
0,30 so stet iz uorhtlichen .
0,31 An dem dritten tage .
0,32 alse ich uernomen habe .
0,33 so wider fluozet ob der erde .
0,34 daz wazer al ze berge .
0,35 widerget im der stram .
0,36 daz sihet wip unde man .
0,37 so truret allez daz der ist .
0,38 wande daz uerteile nahen ist .

0,39 An dem uierden tage .
0,40 so heuet sich diu chlage .
0,41 so heuet sich uon grunde .
0,42 uiske unde allez merwnder .
0,43 ob dem mere si uehtent
0,44 uil lute si brahtent .
0,45 so wirt des luzet rat .
0,46 swaz flozen unde grat hat .
0,47 An dem uinfte tage .
0,48 so wirt ein mere chlage .
0,49 so heuet sich daz geuuogele
0,50 daz e flouch under himele .
0,51 ufen daz geuilde .
0,52 iz si zam oder wilde .
0,53 si wuofent unde weinent .
0,54 mit michelem gescreie .
0,55 si bizzent unde chrouwent .
0,56 einander si houhent .
0,57 des tages harte zergat .
0,58 svvaz uettech unde chla hat .
0,59 So chuomet uil rehte mit sere .
0,60 tach der sehste .
0,61 der himel sich uerwandelot .
0,62 er wirt tunchelrot .
0,63 an den manen unde an dem sunnen .
0,64 sieht man michel wunder .
0,65 der tach wirt alse uorhtlich .
0,66 in die erde bergen si sich .
0,67 An dem sibenten tage .
0,68 so wirt der luft al enwage .
0,69 so uihtet an daz truom .
0,70 die vuiende an daz firmamentu- .
0,71 diu wazer dar widere .
0,72 diu sint under dem himele .
0,73 an dem manen . un- an dem sunnen .
0,74 sihet man michel wunder .
0,75 so horet man diche .
0,76 doner unde bliche .
0,77 so crimmet sich ze ware .
0,78 der arme suntare .
0,79 deme sin gewizzede daz saget .
0,80 daz er gotes hulde niene habet .
0,81 An dem ahtoden tage .
0,82 so wirt diu erde elleu enwage .
0,83 an der stunde .
0,84 so erweget sich uon grunde .
0,85 so ne mach niuht des gestan .
0,86 des uf der erde sol gan .

0,87 so truret wip unde man .
0,88 si ne mach getrosten nieman .
0,89 An dem niunten tage .
0,90 alse ich uernomen habe .
0,91 brestent die steine .
0,92 daz gescihet uor dem urteile .
0,93 si chlibent sich en uiereu .
0,94 so zeiget iz allez schiere .
0,95 daz uurhtet wip unde man .
0,96 unde swer iht uersten chan .
0,97 An dem zehenten tage .
0,98 uil luzel sul wir daz chlagen .
0,99 so zeuallent die burge .
0,100 die durch ruom geworeht wurden .
0,101 berge unde ueste .
0,102 daz muz allez zebresten .
0,103 so ist got ze ware
0,104 ein rehter ebeneare .
0,105 An dem einleften tage .
0,106 des sul wir unsich wol gehaben .
0,107 so zerget uil sciene
0,108 da diu werlt mit ist gezieret .
0,109 golt unde silber .
0,110 unde ander manech wunder .
0,111 nusken unde bouge .
0,112 daz gesmide der frowwen .
0,113 goltuaz unde silberuaz .
0,114 chelche unde chierchscas .
0,115 so muz daz allez zergen .
0,116 daz uon listen ist getan .
0,117 nu wizet daz iz war ist .
0,118 iz zerget unde wirt ein ualewisk .
0,119 An dem zwelften tage .
0,120 so hilfet uns daz uihe chlagen .
0,121 so diu tier gent uz dem walde .
0,122 daz uihe uf dem uelde .
0,123 uil lute si rerent .
0,124 so si zesamene cherent .
0,125 mit luteme gescreie .
0,126 ingengen dem urteile .
0,127 An dem dritzentem tage .
0,128 so ne mach sich niemen wol gehaben .
0,129 so tuont sich diu greber uof .
0,130 diu gebaine machent sich dar uoz .
0,131 alle gemeine .
0,132 ingegen dem urteile .
0,133 iz ist allen den forhtlich .
0,134 die gewizzen sint der sunden ane sich .

0,135 An dem uiercehenten tage .
0,136 so wirt diu biterste chlage .
0,137 so gent diu lute alle uz .
0,138 ir ne bestet nehenez in deme hus .
0,139 si wuofent unde weinent .
0,140 mit luoteme gescreige .
0,141 in dem selben dinge .
0,142 so zergent ime die sinne .
0,143 so ne mach neman gesagen .
0,144 die not diu ist in den tagen .
0,145 uber svven got des uerhenget .
0,146 daz sich sin leben dar gelenget .
0,147 So chuomet der uinfzehente tach .
0,148 so nahet uns der gotes slach .
0,149 so sculn alle die ersterben
0,150 die der ie geborn wurden
0,151 alle gemeine .
0,152 uor dem urteile .
0,153 so heuent sich uier winde .
0,154 in allen den enden .
0,155 ein fuor sich enbrennet .
0,156 daz dise werlt uerendet .
0,157 daz luoteret iz allez .
0,158 so brinnet stein unde holze .
0,159 wazzer unde bhuhele .
0,160 die der sint under dem himele .
0,161 so chumt der iungiste tach .
0,162 also sciene so ein braslach .
0,163 So chomen uon xp-e .
0,164 die uier euangeliste .
0,165 daz gebeine si chukent .
0,166 die toten si wechent .
0,167 so samenent sich mit eren .
0,168 lip unde sele .
0,169 daz ist uil wunnechlich .
0,170 die guoten sint dem sunnen gelich .
0,171 Die engel uuorent scone .
0,172 daz cruce unde die corone .
0,173 uor xp-e an daz taegdinc .
0,174 daz werdent soreichilichiu dinch .
0,175 So chumet xp-c riche .
0,176 uil gewaltichlichen .
0,177 der e tovgen in die werlt chom .
0,178 da sihet in wip unde man .
0,179 im ist sin scare uil breit .
0,180 wand er die uersmacheit leit .
0,181 uon sinen uianden .
0,182 da wil er iz anden .

0,183 So chumet got in den luoften .
0,184 in siner magencrefte .
0,185 er rihtet dem herren .
0,186 unde dem chnehte .
0,187 der frowen un- der diuwe .
0,188 so ist ze spate diu riwe .
0,189 die wir haben solden .
0,190 ob wir genesen wolden .
0,191 so werdent die vil harte geret .
0,192 die hie uon der welt cherent .
0,193 die sizent da ineben gote .
0,194 in der scare der zwelfpoten .
0,195 wande si durch gotes minne .
0,196 uerchurn wertliche wunne .
0,197 die sint alle geheiligot .
0,198 die wirseren sint erteilot .
0,199 So wirdet der uil gut rat .
0,200 die die werlt gezogenlichen hant .
0,201 die gotes nie uergazen .
0,202 do si ze wirtscefte sazen .
0,203 doch wil ich iu sagen da bi .
0,204 wie der leben sol getan sin .
0,205 Si sulen got minnen .
0,206 uon allen ir sinnen .
0,207 uon allem ir herzen .
0,208 uon allen ir werchen .
0,209 si sulen warheit phelegen .
0,210 ir almuosen wol geben .
0,211 mit mazen ir gewant tragen .
0,212 mit chuske ir e haben .
0,213 bescrmet die weisen .
0,214 die geuangen losen .
0,215 si sulen den uianden uergeben .
0,216 gerihtes ane miete phlegen .
0,217 den armen tun gnade .
0,218 die ellenden phahen .
0,219 si sulen ze chirchen gerne gen .
0,220 pihte unde puoze besten .
0,221 swer niht uasten ne mege .
0,222 der sol sin almuosen geben .
0,223 ne mege er des niht gewinnen .
0,224 sinen besemen sol er bringen .
0,225 da mit er sich reine .
0,226 der ist allersaligiste . der sine sunde weinet .
0,227 Swer daz mit triwen begat .
0,228 des wirt da uil gut rat .
0,229 ze dem sprichet der gotesun .
0,230 “uar ze miner zeswen .

0,231 uenite benedicti
0,232 mines uater riche ist iu gerihtet .”
0,233 daz gescihet an dem iungisten zorne .
0,234 da sceidet sich diu helewe . von dem chorne
0,235 diu guten ze der zesewen
0,237 di vbelen ze der winsteren .
0,238 si werdent al gewindet .
0,239 an dem urone tenne .
0,240 dar an denche swer so welle .
0,241 So sprichet got mit grimme .
0,242 ze sinen widerwinnen .
0,243 er zeiget in sine wunden .
0,244 an den uuzen unde an den henden .
0,245 uil harte si bluotent .
0,246 si ne megen da niht widere gebieten .
0,247 uon sineme rehte sprichet in zu .
0,248 “mines willen ne wolt ir niht tun .
0,249 ir hetet min uergezen .
0,250 ir ne gabet mir trinchen noch ezzen .
0,251 seledede noch gewate .
0,252 ubel waren iuwere getate .
0,253 dem tieuele dienote ir mit flize .
0,254 mit im habet diu ewigen wize .”
0,255 da ist der tieuel uon helle .
0,256 mit manegeme sinem gesellen .
0,257 so uahet er die armen .
0,258 vil luzel si im erbarmen .
0,259 mit chetenen unde mit seilen .
0,260 er bintet si algemeine .
0,261 er furet si mit grimme .
0,262 zu anderen sinen gesinden .
0,263 in den tot .
0,264 ane tuwale lident si iemer not .
0,265 mit peche unde mit swebele .
0,266 da dwinget si furder des tieueles ubele .
0,267 da ne hilfet golt noch scaz .
0,268 e bedahten wir iz baz .
0,269 da ist uiur unde swebel .
0,270 wir sturben gerne unde muzen leben .
0,271 durst unde hunger
0,272 aller slahte wunder .
0,273 frost unde sightuom .
0,274 get uns alle tage zuo .
0,275 fiurin gebende .
0,276 dwinget uns die hende .
0,277 machet uns die uuze .
0,278 harte unsuze .
0,279 mit uiurwarwen seilen .

0,280 bindet man si beide .
0,281 man schenchet uns den win .
0,282 des wir gerne ubere mohten sin .
0,283 ezzich unde gallen .
0,284 sam si uiures wallen .
0,285 ezzen haizeu si uns gebent .
0,286 daz ist pech unde swebel .
0,287 uil groz wirt unser semeze .
0,288 die wurme ezzent uns daz herze .
0,289 daz ist uns gewizzenheit .
0,290 diu tut uns also michel leit .
0,315 So der tieuel dane geuert .
0,316 uile wol unser dinch uert .
0,317 so scinet uns scone .
0,318 diu edele psone .
0,319 sich zaiget got mit minnen .
0,320 allen sinen chinden
0,321 so sint die arbeit fuore .
0,322 so singe wir zwire .
0,323 alleluia daz fro sanch .
0,325 wir loben gotes ere .
0,326 mit libe unde mit sele .
0,327 Do uahet ane daz ist war .
0,328 Iubileus daz guote wunneiar .
0,329 so beginne . wir minnen
0,330 di inren sinne
0,331 uernunft unde ratio .
0,332 diu edele meditatio .
0,333 da mit erchenne wir crist .
0,334 daz er iz allez ist .
0,335 so habe wir uil michel wunne .
0,336 so si wir siben stunde . sconer denne der sunne .
0,337 zuo der selben scone .
0,338 so gibet uns got ze lone .
0,339 eine uil statige iugende .
0,340 unde manige herliche tugende .
0,341 wir sulen stanche werden .
0,342 wolten wir di berge .
0,343 zebrechen alse daz glas .
0,344 ze ware sag ich iu daz .
0,345 die craft habent da diu goteschind
0,346 die hie mit flize . guot sint .
0,347 do habe wir daz ewige lieht .
0,348 neheines sightuomes niht .
0,349 da ist diu ueste winescapht .
0,350 diu miltest trutscapht .
0,351 diu chunehlic ere .
0,352 die haben wir iemermer .

0,353 daz unsagelich lon .
0,355 habent die gotes erben .
0,356 die da nach wolten werfen .
0,357 emphiliehe wir hie die sunde .
0,358 wir sin da sneller denne die winde .
0,359 nu uernemet alle da bi .
0,360 da sit edele unde fri .
0,361 da ne ne dwinget iuch sunde noch leit .
0,362 daz ist diu ganze friheit .
0,363 da ergezet uns got sciene .
0,364 aller der sere .
0,365 die wir manege stunden .
0,366 liden in ellende .
0,367 da ist daz ewige leben .
0,368 daz ist uns alzogen gegeben .
0,369 crist unser hertuom
0,370 unser uernunft unde unser wistuom .
0,371 der ist gecheret an in .
0,372 uil edele ist unser sin .
0,373 unser herze unde unsere ougen .
0,374 sehent die gotes tougen .
0,375 uil girlich wirt daz selbe licht .
0,376 iz ne wirt zeranclich nicht .
0,377 daz habent allez diu goteschind .
0,378 diu hie diemuote sint .
0,379 die ir scephare lobent .
0,380 unde hie ir uanden uergebent .
0,381 die uersmahent hie nidene .
0,382 swi so si da ze himele .
0,383 mit goten geren ze habene .
0,384 da ist uil guot ze lebenne .
0,385 da wirt ir gelovbe ain warheit .
0,386 ir gedinge mit habenne ein sicherhait .
0,388 si sint den engel gelich .
0,389 daz habent si an ende .
0,390 nu weset uil wol gesunde .
0,391 in der selben rawe .
0,392 dar muozet . ir chomen . aMEN .
0,393 dizze buoch dihtote .
0,394 zweier chinde muoter .
0,395 diu sageten ir disen sin .
0,396 michel mandunge was under in .
0,397 der muoter waren diu chint liep .
0,398 der eine uon der werlt scieht .
0,399 nu bitte ich iuch gemeine .
0,400 michel unde chleine .
0,401 swer dize buoch lese .
0,402 daz er siner sele gnaden wunskende wese .

0,403 umbe den einen der noch lebet .
0,404 unde er in den arbeiten strebet .
0,405 dem wunsket gnaden .
0,406 un der muoter daz ist ava .